

## JEMS

### Kipihac wê Jems kivuu ge

<sup>1</sup> A Jems, a ga Anutu yuu Apumtau Yesu Kĩlisi nu yuac a, om a kivuu kipihac tiga i loc vô xam Islele wê xam pum lec Jekop nue vigê yuu di tô mi la yuu ge, lêc gwêbaga xam sea bom di toto loc dô vac tibii viyang ba ben. A nêl vidiiên vô xam.

#### *Viyin i vông xovôên vô il*

<sup>2</sup> Xam lige, buc wê xam obêc tulec viyin ya ge od xam nilôm i o lêc vô viyin lêm. Nge, xam nilôm i nivihã, <sup>3</sup> di xam vyac xovô bê viyin tigege tulec xam nêb ob yaxên xam nêm vông vinên, lêc wê xam obêc vông i vin Anutu xêkizêc ge od xam obêc le pĩlihi mi dô. <sup>4</sup> Om xam le pĩlihi vac viyin mi dô i tiyi lec buc vihati, êdêc i vô nivihã vô xam di vông xam tu xomxo wê nivihã lee i tiyi wê xam ob timu vô Anutu kiyang vihati ge.

#### *Xomxo ti piyôp obêc myabo ge od i kitaa vô Anutu*

<sup>5</sup> Xam ti piyôp obêc myabo ge od i kitaa vô Anutu bê Anutu i vông piyôp nivihã vô i, ge od Anutu obêc vông vô i. Ên Anutu ge wê ob vông susu vô xomxo vihati ge di ob kol ên xomxo ti di kunac i lêm. <sup>6</sup> Lêc xomxo ti obêc kitaa ge, od i vông i vin xêkizêc, di nilô i o lêc vông yuu lêm. Ên xomxo ti wê nilô vông yuu ge tiyi xobê gwec wê lea vivê di i vô myapilôhô pileva ge. <sup>7</sup> Om

xomxo tibêge i o léc so bê Apumtau ob vông susu ti vô i lêm, <sup>8</sup> ên xomxo tibêge mi xo kiyang tibeac di o timu vô môp tibecl lêm.

*Xomxo wê nêen susu maên gee yuu xomxo wê susu tibeac gee*

<sup>9</sup> Lige vông vinên wê nêen susu maên ge, he i dô hixôn xêyaa nivîha, ên wê Anutu hôm he lec nivîha ge. <sup>10</sup> Di lige vông vinên wê susu tibeac ge, he i dô hixôn xêyaa nivîha ên wê he susu tibeac lê, léc he tiyi xocbê xomxo pileva ge. Ên xomxo wê susu tibeac gee obêc yib tiyi xocbê nita maviya wê vuac ge, <sup>11</sup> léc hiyôv obêc linac myapilihi ge od ya i ngigo di maviya nivîha tyo ob yal la vêl di i yib. Om xomxo wê susu tibeac gee obêc vông yuac lec mi dô lê, léc buc wê obêc yib ge od ob sea yuac yuu susu vihati obêc dô xel, di ob yib mi la pileva.

*Susu wê ob yaxên xomxo ge*

<sup>12</sup> Xomxo ti obêc le pilihi vac viyin ge od i xêyaa i vô nivîha, ên Anutu obêc pimil i di vông i dô maviha luta tiyi xocbê hilu kiyang pyap nêb ob vông vô xomxo wê he xêyaa vin lec i ge. <sup>13</sup> Léc xomxo ti nilô obêc kidu i nêb i vông soên ti ge od i o léc nêl bê Anutu didii i vac nipaên tige lêm. Ên nipaên ti o tiyi wê ob yaxên Anutu ge lêm, di Anutu ob didii xomxo ti vac nipaên lêm. <sup>14</sup> Léc yaxên tige kehe yêp vac il toto nilôd, om kidu il nêb il vông môp soên. <sup>15</sup> Nang dêc nipaên wê yêp vac il nilôd ge vô nôn lec di vông il vac nipaên. Om nipaên obêc vô levac ge od nôn bêga nêbê il obêc xib di la xôa ma timuên.

16 Om xam lige, le i léc vông i vin kiyang kityooên wê nêl ên nêbê Anutu ob didii il vac nipaên ge lêm. 17 Ên vizid yuu susu nivihaviha vihati lam gê lag puunê. Ge Mag Anutu vaci vông i lam vô il. Anutu ge xêseac kehe, di ob pilepac i xocbê hiyôv yuu dentuc ge lêm. Nge, i xêseac kehe wê obêc dô luta. 18 Anutu vaci xovô nêb ob vông il tu i nue om vông il vô paha lec ya kiyang nôl wê i vông ge. Anutu vông bêge, ên nêb il tu i nue mugên wê il luu susu vihati wê i tung ge vêl.

*Il ob ngô Anutu vya di timu vô*

19 Xam lige, xam vyac xovô môp bêga bê xam vihati ngô kiyang mi xovô nivihha lê, di le i léc nêl kiyang lec lutibed lêm, di le i léc kunacma decdec lêm. 20 Ên xêyaa myavinê wê xomxo vông ge ob vông môp nivihha wê Anutu vông ge i vô nôl lec lêm. 21 Om xam sea môp nipaên yuu judajuda wê yêp vac xam nilôm ge, di xam loc vac Anutu kwa ngibi di hôm kiyang wê Anutu vông mi i yêp vac xam nilôm ge xôn. Ên kiyang tige tiyi wê obêc vô xam vêl ên nipaên di vông xam lax vô Anutu.

22 Om xam timu vô Anutu kiyang vihati di xam o léc ngô pileva lêm. Ên xam obêc ngô pileva ge od xam kityoo xam. 23 Ên xomxo ti obêc ngô Anutu kiyang lê, léc ngô pileva di o timu vô lêm ge, od ge tiyi xocbê xomxo ti yê manôn vac deac ge. 24 Yê manôn vac deac pyap léc la ge od o xovô manôn wê yê vac deac ge lêm. 25 Anutu xolac nivihha ge wê piwelac il vêl ên nipaên wê ku il xôn ge, om xomxo ti obêc xovô xolac tige

niviha mi timu vô, di o ngô pileva di lungên lêm ge, od xomxo tige obêc dô hixôn xêyaa nivihati tiiyi lec buc vihati.

<sup>26</sup> Xomxo ti obêc xo nêbê i xomxo nivihati ên wê mi vông lilo di mi kitaa vô Anutu ge, lêc o viac mya nivihati lêm ge od kityoo i di vông lilo yuu kitaa ge pisiv. <sup>27</sup> Xomxo vông vinên nêc môt wê Mag Anutu ob yê nivihati ge bêga nêc il ob ngidu pibua yuu vêxôv wê dô vac viyin ge xôn, di il ob viac il nivihati êdêc môt kibun ga i o lêc vông il vô nipaên lêm.

## 2

### *Il ob xê xomxo vihati i tiyima*

<sup>1</sup> Xam lige, xam vông i vin Apumtau Yesu Kilisi, wê il nêd levac di xêseac kehe ge, om xam o lêc hôt xomxo wê lê levac ge lec di vô nimim vô xomxo wê nêc susu maên ge lêm. <sup>2</sup> Ên obêc tiiyi xochê xam kitucma mi dô lê, lêc xomxo yuu miloc vô xam, xomxo ngwe ob miloc hixôn ngakwi yuu vunac vunac nivihati, di ngwe ob miloc hixôn nêc ngakwi nipaên. <sup>3</sup> Mêd xam obêc hôt ngwe wê ngakwi nivihati ge lec di nêc vô i bêga bê, “Lam dô lec sia nivihati tiga,” di nêc vô xomxo susu maên ngweo bêga bê, “Ông loc le ganê, mad lam dô nêc vô a vixag ga.” <sup>4</sup> Xam obêc vông bêge ge od ge xam yaxên xomxo ya piyôp soên wê xam vông ge mi wê xomxo ya nivihati di wê ya nipaên.

<sup>5</sup> Xam lige, xam ngô lê. Xomxo wê susu maên gê kibun ga ge wê Anutu vînoo he pyap nêc he i tu xomxo wê vông vinên xêkizêc ge, di nêc nêc

he ge wê ob la dô vac i ben lag puunê di kô vizid nivihha wê Anutu hilu pyap nêb ob vông vô xomxo wê he xêyaa vin lec i ge. <sup>6</sup> Om bêna léc xam vông xomxo wê susu maên ge vô nipaên mi dô hixôn ni yocênê? Xam xovô ên xam nêbê viyin lam gê na vô xamê? Xam xovô bê xomxo wê susu tibeac yuu mone levac ge wê mi vông viyin vô xam di kô xam mi la vac kot ge. <sup>7</sup> Xam vông i vin Yesu lê di tu i nue, léc xomxo wê mone levac ge wê mi so vya vô lê nivihha tige, léc bêna léc xam kô he lecê?

<sup>8</sup> Il Apumtau Anutu nêl kiyang ti mi i yêp vac xolac bêga ên nêbê, “Ông xêmyaa i vin lec xomxo baba ge i tiyi xocbê ông xêmyaa vin lec ôcông va ge.” Om xam obêc timu vô kiyang tige ge od xam vông môp nivihha mêngê. <sup>9</sup> Léc xam obêc hêm xomxo mangwe lec mi pimil he di wê mangwe nipaên ge od xam vông ge so, di xolac nêl xam nêl kitong nêbê xam vông nipaên. <sup>10</sup> Ên xomxo ti obêc timu vô xolac vihati nivihha, léc vông bo ti la tiyiên ma ge od tiyi xocbê pwoo xolac vihati ge vac. <sup>11</sup> Ên Anutu nêl bêga nêbê, “Xam o léc vông yôdac vêx yuu vux lêm,” di nêl hixôn ên nêbê, “Xam o léc hi xomxo i yib lêm.” Om yôdac vêx yuu vux obêc ma, léc ông hi xomxo ti yib ge od ông vông xolac vihati vô nipaên. <sup>12</sup> Om xam vyac xovô di vông môp yuu kiyang vihati i tiyi xocbê kiyang wê yêp vac Anutu xolac ge. Ên xolac tige wê piwelac il vêl ên nipaên di vông il lôm dô vac nivihha ge, om buc timuên Anutu obêc yaxên il nêd môp lec xolac tige. <sup>13</sup> Mêngem xomxo ti obêc xo vigwe pisiv ên

xomxo baba lêm ge od Anutu obêc xo vigwe pisiv ên xomxo tibêge lec buc wê ob titô il nêd kiyang ge lêm. Lêc xomxo wê xo vigwe pisiv ên xomxo baba ge, ge wê obêc la dô nivîha vô buc wê Anutu ob titô il nêd kiyang ge.

*Vông vinên nôn yuu vông vinên mayibên*

<sup>14</sup> Xam lige, xomxo ti obêc nêb i xomxo vông vinên, lêc o vông môm nivîha hixôn lêm ge od i nêb vông vinên ge, mya nêl pileva di o tiyi wê ob vô i vêl ên nipaên di vông i dô vac nivîha ge lêm.

<sup>15</sup> Xam lime wê ngakwi yuu yaên ma ge ti obêc miloc vô xam, <sup>16</sup> lêc xam ti obêc nêl vô i bêga bê, “Loc hixôn xêmyaa nivîha, di vînyum ngakwi lec ên lea di wa yaên ên i den ông.” Xam obêc nêl bêge, lêc xam obêc vông yaên yuu ngakwi wê ob ngidu i ninivi xôn ge lêm ge od kiyang tige ob vô nivîha vô i tibêna? <sup>17</sup> Il nêd môm vông vinên tiyi bêge. Ên vông vinên wê il vông ge obêc vông môm nivîha ti lêm ge od il nêd vông vinên ge mayibên.

<sup>18</sup> Lêc xomxo ti mêd obêc nêl bêga bê, “A ga wê a vông i vin di ông ge wê ông mi vông môm nivîha.” Lêc a ob nêl vô i bêga bê, “Ông nêb ông vông i vin lê, lêc ông o vông môm nivîha ti hixôn lêm. Om ông nêb vông vinên ob yêp seac mi xe xê tibêna? Dom a ga, a vông i vin nôn, om môm nivîha wê a mi vông ge nêl vông vinên wê a vông ge kitong seac.” <sup>19</sup> Ông vông i vin ên ông nêbê Anutu tibed. Ge nivîha lê, lêcom vimwo nipaên êno vông i vin kiyang tige di xona mabu, lêc he o tu Anutu nue lêm. <sup>20</sup> Ông ge piyôp maên, ên

ông vông i vin pileva di ông o vông môt nivîha hixôn lêm, om ông nêb vông vinên ge mayibên di nôn ma. Lêc mêd ông nêb a nêl kiyang tige kehe kitong vô ông, om ông ngô lê. <sup>21</sup> Ilage il bug Eblaham vông nu Aisak tu daa vô Anutu tiyi xocbê Anutu nêl vô i ge, om Anutu yê môt wê i vông ge nêb i xomxo nivîha. <sup>22</sup> Om ông xovô bêga bê Eblaham vông i vin Anutu di vông môt nivîha hixôn, om môt nivîha wê ivông ge vông i nêb vông vinên vô nôn lec. <sup>23</sup> Mêgem kiyang wê yêp vac xolac ge vô nôn lec bêga nêbê, “Eblaham vông i vin Anutu om Anutu yê vông vinên wê i vông ge di nêl nêbê i xomxo nivîha.” Di Anutu yê Eblaham nêbê i nu wê yuu xêyaa vin lecma ge. <sup>24</sup> Om il ob xovô bêga bê Anutu ob yê nêbê xomxo ti nivîha lec vông vinên pileva lêm. Nge, Anutu obêc yê nôn nivîha wê yêp seac vac vông vinên wê i vông ge od ob nêl bê i xomxo vông vinên nôn.

<sup>25</sup> Tiyi xocbê môt wê vêx yôdac Leahap vông ge. Ên xomxo yuu wê Josua vông yuu la ên nêb yuu loc yê vigwe ge, Leahap viac yuu nivîha di vông yuu lax mî la môt bangwe mî la, om Anutu yê vêx tige nivîha lec yuac wê i vông ge. <sup>26</sup> Om il ob xovô bêga bê xomxo ti obêc vông i vin ya mya pileva di o vông môt nivîha hixôn lêm ge od vông vinên wê i vông ge mayibên, tiyi xocbê xomxo ninivi wê myakilôhô la vêl di ninivi vaci yêp ge.

### 3

*Il ob viac myad i nivîha*

<sup>1</sup> Xam lige, xam o léc nêl bê xam tibeac ob tu xomxo xolac nêlên lêm, ên il xovô bê buc timuên wê Anutu obêc titô il nêd kiyang ge od obêc pîlii xe wê xomxo xolac nêlên ge, xe nêm kiyang lê, léc vông myaviwen nipaên vô xe luu xomxo baba vêl. <sup>2</sup> Il vihati mi vông môp soên, léc xomxo ti obêc nêl kiyang nivîha di ti soên ma ge od xomxo tibêge nivîha yang, tiyi wê ob viac i ninivi yuu môp vihati nivîha êno ge. <sup>3</sup> Xam xovô lê. Il obêc tung ain nipwo tya vac xôhô mya ge od il ob pop xôhô nôn levac tige ya susu nipwo tya gedi i la bôbac vô môp wê il nêb il ob la vô ge. <sup>4</sup> Di xam xovô lec sip êno. Sip ge susu mabu yocên lê, léc obêc le pileva ge od lea obêc kô mi la vac gwec. Di sip stia ge susu nipwo tya lê, léc xomxo ti wê mi kô sip ge obêc hêm lec mi ngîbina ge od sip la bôbac vô môp ti wê nêb ob la vô ge. <sup>5</sup> Di get êno bêge. Il get ge nipwo tya, léc yong i tiyi xocbê susu levac ti.

Di xam xovô lec ngwax. Ên ngwax nipwo tya tiyi wê ob ya nagyi levac ma vêl. <sup>6</sup> Di il get ge tiyi xocbê ngwax. Ên il get wê dô vac il myad ge keac kiyang nipaên tibeac di vông il nidnivi vihati vô nipaên. Seten vaci vông nipaên vac il get, mêgem tum mahelac xocbê ngwax ge lec il nêd môp di ya i vô nipaên. <sup>7</sup> Xomxo tiyi wê ob kô bwoc vîmen yuu menac di myel yuu lîlii wê dô vac nita di dô vac mia ge viyang viyang di vông he vô malehe lec ge, om xomxo mi vông bêge. <sup>8</sup> Léc xomxo ti o tiyi wê ici va ob vông get vô malehe lec ge lêm. Ên il get mi nêl kiyang nipaên vaxvax tibeac om nipaên tige la vông xomxo nîlô



vuac di hibu sea. <sup>9</sup> Il pimil Mag Apumtau ya il get lê, nang dêc il get so vya vô xomxo wê Anutu tung he tiyi ici va kinu ge. <sup>10</sup> Om kiyang yuu lam vac il myad tived. Ngwe, il pimil Anutu, di ngwe, kiyang nipaên. Xam lige, môp bêge tiyiên ma vêl. <sup>11</sup> Mia numên yuu mia gwec, yuu xôn o pituv vac maliyuhu tived lêm. <sup>12</sup> Xam lige, kwacsung mêd tiyi wê ob vuac nôn hîguc ge, me? Me xeb tiyi wê ob vô nôn xochê gulac nôn ge, me? Ma vêl. Di gwec êno o tiyi wê ob pilepac mia numên ge lêm. Om xam xovô bêga bê xomxo wê kiyang nipaên yêp vac i nilô ge od ob nêl kiyang nipaên, dom xomxo wê kiyang nivîha yêp vac i nilô ge od ob nêl kiyang nivîha.

*Piyôp yuu xovôên nivîha lam vô Anutu*

<sup>13</sup> Xomxo wê piyôp yuu xovôên nivîha ge od i léc tup vô môp nivîha di i o léc yong i lêm, êdêc xomxo i yê di xovô bê i xomxo xovôên nôn. <sup>14</sup> Léc xam obêc dô hixôn nilôm nipaên vô xomxo ya di xam obêc xovô nêbê xam ob vông i tiyi wê xam nilôm xovô ge ên i vô nivîha vô xacxam va ge, od xam o léc yong xam bê xam piyôp levac lêm, ên ge xam pwoo kiyang nôn di nêl kiyang kityooên. <sup>15</sup> Ên xovôên tibêge o lam gê lag puunê vô Anutu lêm. Nge, ge nipaên kibun ga wê xomxo nilô xovô di Seten vaci tu kehe ge. <sup>16</sup> Ên xomxo obêc dô hixôn nilô nipaên vô xomxo ya, di obêc xovô nêbê he ob vông i tiyi wê he nilô xovô ge ên i vô nivîha vô heche va ge od he ob dô vac nivîha ti lêm. Nge, he ob dô vac viyin di nipaên viyang viyang obêc hivun he xôn. <sup>17</sup> Léc xomxo wê kô xovôên nivîha vô Anutu ge od ob

vông môt bêga bê nipaên ti o yêp vac he nilô lêm, di he dô vac malehe, di he lum nêl kiyang voma, di he vô ninya lehe vô lie kiyang, di he xo vîgwe pisiv ên xomxo di vông môt nivîha vô he, di he vông môt nivîha vô xomxo vîhati tiyima, di he vông i vin nôn di o nêl ya mya pileva lêm. <sup>18</sup> Di xomxo wê nêl kiyang malehe vô lie ên nêb he xôn ob dô hixôn xêyaa nivîha ge, ge tiyi xocbê he xin vê vac yuac om vê tige obêc tyip mi vô nôn nivîha.

## 4

*Xomxo wê xêyaa vin lec susu kibun ga ge vông vevac vô Anutu*

<sup>1</sup> Xame, xam kunacma di nêl kiyang vevac voma ên va? Kehe bêga bê xam nêl nilôm ngaên vông xam nim nyag voma di xam kunacma di hima lec. <sup>2</sup> Ên xam xêmyaa vin lec susu viyang viyang gee ên xam nêb xam ob kô lê, lêc xam kôên ma, om xam nêbê xam ob hi xomxo i yib lec. Di xam do mam vô susu viyang viyang gee, lêc tiyiên ma wê xam ob kô ge, om xam kunacma di hima lec. Xam o kô susu wê xam nêb xam ob kô ge lêm, di kehe bêga bê xam o mi kitaa vô Anutu lec susu tige lêm. <sup>3</sup> Lêc buc ya xam kitaa vô Anutu ên xam nêb i vông susu vô xam lê, lêc Anutu vôngên ma, ên xam o kitaa i la nivîha lêm. Nge, xam kitaa ên xam nêb Anutu i vông susu wê ob vô nivîha vô xacxam va ge. <sup>4</sup> Xam ge wê xam sea Anutu xolac ge mêge. Ên xomxo xêyaa obêc vin lec susu yuu môt kibun ga ge, od ge tiyi xocbê he vông vevac vô Anutu ge, lêc mêd xam lungên tige, me? Ga a nêl vô xam

ên a nêbê xomxo ti obêc vông nilô la vô susu kibun ga ge od tiyi xocbê vông vevac vô Anutu. <sup>5</sup> Ên kiyang yêp vac xolac bêga nêbê, “Il kinud wê Anutu tung vac il nilôd ge, Anutu yê xôn nêb il vông i loc diluhu vô ici va.” Kiyang nêl bêge, lêc xam mêd xo ên xam nêb Anutu nêl kiyang ga kityooên vô xam, me?

<sup>6</sup> Lêc Anutu xêyaa vin lec il luu vêl om nêb ob ngidu il xôn, tiyi xocbê kiyang wê yêp vac xolac bêga ên nêbê, “Xomxo wê yong he vô Anutu ge, od Anutu obêc ngiloo he vêl. Lêc xomxo wê vông he vô nipwo lec di la vac Anutu kwa ngibi ge, od Anutu obêc xo vigwe pisiv ên he di ngidu he xôn.” <sup>7</sup> Om xam pilepac xam di loc vac Anutu kwa ngibi. Di xam lê pilihi di tii Seten ên i pec vêl ên xam. <sup>8</sup> Xam loc kwabo vô Anutu, ên xam obêc la kwabo vô Anutu ge od Anutu êno ob lam kwabo vô xam. Lêc xam ge tibii nipaên, om xam pilepac nilôm i vô paha lec i tiyi xocbê xomxo lipac vigê vô paha lec ge. Xam nilôm ge vông yuu, om xam sea vilu wê nipaên ge di vông nilôm yuu piyôp i loc diluhu vô Anutu. <sup>9</sup> Di xam nilôm i vô viyin di xam byag ên nêb nipaên lê. Gwêbaga xam nap hixôn xêmyaa nivîha, lêcom xam pilepac nilôm napên di byag hixôn nilôm viyin ên nêb nipaên wê xam vông ge lê. <sup>10</sup> Xam pilepac xam vô Apumtau manôn, ên xam obêc vông bêge ge od Apumtau obêc hôm xam lec di vông lê levac vô xam.

*Il ob so vyad vô lige ngwe lêm*

<sup>11</sup> Xam lige, xam o lêc so vyam vô lime vông vinên lêm. Ên xomxo ti obêc so vya vô li ngwe,

me yaxên i nêb i xomxo nipaên ti ge od ge tiyi xocbê so vya vô xolac di yaxên nêbê xolac ge nipaên. Di xam obêc yaxên xolac bêge ge od xam o timu vô xolac lêm. Nge, xam dô tiyi xocbê xomxo wê nêb ob yaxên xolac mi yê bêc nivîha me nipaên ge. <sup>12</sup> Lêc Anutu tîbed wê tu xolac kehe ge di i tîbed wê ob yaxên xomxo ge. Om Anutu tiyi wê ob hòm xomxo lec, di i tiyi wê ob kitya xomxo vêl ge. Lêc xam letya wê xam nêb xam ob yaxên lime ge?

<sup>13</sup> Xam ngô lê. Xam ya yong xam di nêl ên xam nêbê, “Gwêba me titige od xe ob la vac vigwe levac tiganê, ên la dô klîsmas ti di vông yuac bisnis ên kô mone levac lec.” Lêc a ob nêl vô xam bê <sup>14</sup> xam o xovô susu wê ob val vô xam titige lêm. Di buc wê xam ob dô mamvîha ge, od xam ob dô bêna? Ge xam lungên, ên xam dô ge tiyi xocbê ngwaxlu wê ob didii loc myabo tya di xôa ma lutibed ge. <sup>15</sup> Om xam lêc nêl kiyang ngwe bêga bê, “Apumtau obêc tyuc lec nêb il dô madvîha di vông yuac ngwe ga me ngwe ganê ge, od il ob vông.” Xam obêc nêl ngwe bêge od obêc nivîha. <sup>16</sup> Lêcom xam yong xam di pimil xam, lêc kiyang tibêge nipaên. <sup>17</sup> Om xam xovô lê. Xomxo ti obêc xovô môp nivîha wê Anutu nêb il vông ge lê, lêc vôngên ma ge od i nêl so.

## 5

### *Xomxo wê mone yuu susu tibeac gee*

<sup>1</sup> Xam wê mone levac yuu susu tibeac gee, xam ngô di xovô viyin wê obêc val vô xam ge lê, di xam byag di iac ên xam lê. <sup>2</sup> Susu vîhati wê xam

vông ge pital sea, di xam nê m vinyumên vihati ge, mun yuu gwaakivac kitov sea. <sup>3</sup> Di xam nê mone gol yuu silva ge, guva iac sea, om guva tige obêc nêl xam nê m nipaên kitong, di myavinê obêc ya xam nimnivi tiyi xocbê ngwax ya ge. Ên xam kituc susu yuu mone tibeac dô, lêc buc timuên wê xam ob kô myaviwen lec ge vô kwabo lec. <sup>4</sup> Xam ngô lê. Xomxo wê vông yuac vô xam lec yaên gee, xam mi kityoo he ya mone nipwo tya di hêm viwen xôn. Om he nê mone wê dô vô xam ge nêl xam nê m nipaên kitong, di xêkizêc kehe Apumtau ngô xam nê m soên wê nume yuac tige nêl ge. <sup>5</sup> Tiyi buc vihati wê xam dô kibun ga, xam kô susu nivihaviha tibeac di dô hixôn xêmyaa nivihaha, di xam vet nilôm ya yaên mi i pup lec, lêc buc wê myaviwen ob kitya xam vêl ge vô kwabo lec pyap. <sup>6</sup> Xam mi vông kot vô xomxo nivihaha mi hi he yib, lêc he o hi xam di vông myaviwen ti lôc vô xam lê m.

*Il ob le pilihi vac viyin di dô bin Apumtau*

<sup>7</sup> Om xam lige vông vinên, xam le pilihi vac viyin di dô bin buc wê Apumtau obêc lop mi lô m ge. Il xovô ên il nêbê xomxo wê vông yuac yaên ge nêb ob kô yaên nô n om dô bin buc wê lun ob tô lec yaên tige ên nêb i vô nô n nivihaha. <sup>8</sup> Om xam le pilihi di dô bin Apumtau êno bêge. Di xam vông i vin xêkizêc ta mi dô, ên buc wê Apumtau obêc lô m ge vô kwabo lec.

<sup>9</sup> Xam lige, xam o lêc kunac lime di so vyam vô he lê m, êdêc kô myaviwen nipaên lec lê m. Ên xomxo ti wê obêc yaxên il nêd kiyang timuên ge val le kwabo pyap. <sup>10</sup> Xam lige, xam xovô plopete

môp ilage wê he nêl xolac lec Apumtau lê di tibii le vông viyin levac vô he, léc he le xêkizêc di kilê viyin. Mêgem xam kilê viyin mi timu vô he vixa xocbê he kilê ge. <sup>11</sup> Ên il mi nêl ên il nêbê xomxo wê le xêkizêc vac viyin gee, he ob dô hixôn xêyaa nivîha. Xam xovô Jop kiyang pyap wê nêl ên nêbê Jop le pilihi vac viyin viyang viyang wê tulec i ge, di timuên Apumtau vông môp nivîha vô Jop tii vac, ên Apumtau ge wê xo vigwe pisiv ên il vihati om ob ngidu il xôn.

*Il ob nêl bê il nêl kiyang nôl lag puunê lêm*

<sup>12</sup> Xam lige, a ob nêl kiyang levac ti vô xam mi xam ngô lê. Kiyang bêga bê xam ti obêc nêl kiyang ti ge od xam o léc nêl lag puunê me kibun me susu ti lê hixôn ên i ngidu ông kiyang xôn lêm. Nge, xam obêc lee yuu lec xomxo ngwe kiyang ge od xam nêl myabo bê “ngee”, ge od pyap. Léc ma ge od xam nêl bêga bê “ma”, ge od pyap. Xam nêl bêge êdêc myaviwen nipaên i o léc lôl lec xam lêm.

*Kitaaên wê xomxo vông vinên vông ge xêkizêc*

<sup>13</sup> Xam lime ti obêc tulec viyin ge od i kitaa vô Anutu lê. Me xam ti xêmyaa obêc vô nivîha ge od i vông lilo vô Anutu hixôn pimilên. <sup>14</sup> Léc xam ti obêc vông yidac ge od i nêl gyovixa i lam, ên he i lam lipac wel lec i ninivi lec Apumtau Yesu lê di kitaa lec i bê Anutu i vông i vô nivîha lec. <sup>15</sup> Di he obêc vông i vin Anutu di kitaa ge od Apumtau Anutu obêc vông xomxo tige vô nivîha lec tii vac, di i nêl nipaên obêc yêp ge od Anutu obêc kitya vêl. <sup>16</sup> Mêgem xam nêl nêl nipaên kitong voma di xam toto kitaa vô Anutu lec lime,

ên Anutu i vông he i vô nivihã lec. Ên kitaaên wê xomxo vông vinên vông ge xêkizêc tiyi wê ob vô nôn di ngidu xomxo xôn ge. <sup>17</sup> Xam xovô lec Ilaija lê. Ên Ilaija ge xomxo tiyi xochê il ga, lêcom kitaa xêkizêc vô Anutu ên nêbê lun i nux, mêgem lun nux tiyi klismas yon di dentuc vigê vilu di sec ti. <sup>18</sup> Nang dêc kitaa nang nêbê lun i val, om lun val mêd yaên tyip mi vô nôn.

*Il ob vô il vêl ên môp nipaên*

<sup>19</sup> Xam lige, xam lime ti obêc sea xolac nôn di la vac môp nipaên, lêc li ngwe obêc didii i lôm vac nivihã ge, <sup>20</sup> od xam xovô bêga bê xomxo ti obêc vô li ngwe vêl ên môp nipaên ge, od tiyi xochê vô li tige vêl ên wê ob yib mi la vac nipaên ge, di Anutu ob kitya i nêc nipaên toto ge vêl.

**Yesu Xolac**  
**The New Testament in the Patep Language of Papua**  
**New Guinea**  
**Nupela Testamen long tokples Patep long Niugini**  
copyright © 1986 Wycliffe Bible Translators, Inc.

Language: Patep

Translation by: Wycliffe Bible Translators

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2016-09-14

---

PDF generated using Haiola and XeLaTeX on 22 Feb 2024 from source files dated 31 Aug 2023

3d2c844d-4bc8-590b-bbf2-3a5fcd1f7ad8